

*Orde do 31 de marzo de 2006 pola que se establecen e regulan axudas para a conservación e recuperación das poboacións de coello de monte autóctono.*

O coello de monte é o principal obxectivo da caza menor en Galicia. Este lagomorfo sufriu nos últimos anos o progresivo descenso da actividade agrícola no medio rural e o paulatino abandono dos cultivos que constituían unha parte importante da dieta destes animais e, a maiores, o azote da enfermidade hemorráxica vírica e da mixomatose, polo que diminuíron dramaticamente as súas poboacións.

Co obxecto de reforzar estas poboacións deficitarias recorreuse a repoboar os nosos montes con coellos híbridos, procedentes de granxas cinxéticas, que están a poñer en perigo a calidade xenética das poboacións cunícolas autóctonas.

Os poderes públicos deben garantir a compatibilidade dos usos e actividades humanas coa conservación dos recursos naturais por medio do seu uso prudente e racional. Neste sentido, o labor da Administración autonómica, entre outros, é intentar harmonizar as actividades tradicionais e económicas coa conservación e os aproveitamentos sustentables dos recursos.

Por todo iso, faise necesario poñer en marcha un programa de axudas que, incentivando actuacións racionais no medio natural, propicien a recuperación do noso coello autóctono.

A presente orde pretende establecer unha liña de axudas económicas para fomentar a construción de instalacións de produción e cría en semiliberdade do coello de monte, propiciar o restablecemento das súas poboacións, naqueles espazos en que xa non queden efectivos ou se atopen en niveis moi baixos, ao tempo que se reforza a presenza de exemplares autóctonos en substitución dos coellos híbridos utilizados nas repoboacións dos montes nos últimos anos.

O artigo 148.1º.11 da Constitución española, así como o artigo 27.15º do Estatuto de autonomía de Galicia, confire á nosa comunidade autónoma a competencia exclusiva en materia de caza.

O Decreto 1/2006, do 12 de xaneiro, polo que se establece a estrutura orgánica da Consellería de Medio Ambiente e Desenvolvemento Sostible, en relación co Decreto 211/2005, do 3 de agosto, polo que se modifica a estrutura orgánica da Xunta de Galicia, e o Decreto 232/2005, do 11 de agosto, polo que se fixa a estrutura orgánica dos departamentos da Xunta de Galicia, atribúen á citada consellería, dentro das súas competencias o fomento, a ordenación e o aproveitamento dos recursos cinxéticos.

Por outra parte, a Lei 4/1997, do 25 de xuño, de caza de Galicia, establece a competencia na planificación, ordenación, fomento, vixilancia e control da caza á consellería, a cal realizará cantas actuacións considere precisas para acadar os fins da lei. Entre elas, e co fin de conservar, preservar e mellorar o hábitat natural das diferentes especies cinxéticas, a Xunta de Galicia poderá acordar as oportunas medidas de axuda para o logro do dito obxectivo e cantas outras de carácter limitativo, correctoras ou restauradoras persigan idéntica finalidade. Desta maneira, xunto coa creación dun instrumento xurídico regulador da caza en Galicia, posibilitouse a creación dun instrumento financeiro orien-

tado ao fomento daquelas actividades encamiñadas á conservación e mellora do recurso cinxético por medio dun aproveitamento sustentable.

A Comunidade Autónoma de Galicia procedeu a través da Lei 14/2004, do 29 de decembro, de medidas tributarias e de réxime administrativo, á adaptación do actual tratamento das subvencións, recollido na Lei de réxime financeiro e orzamentario de Galicia ao contido das disposicións de carácter básico da Lei estatal 38/2003, do 17 de novembro, xeral de subvencións, mantendo plenamente aplicable e vixente o resto da regulación que define o réxime das subvencións.

A Lei 14/2004, do 29 de decembro, de medidas fiscais e de réxime administrativo, modifica o artigo 78 do texto refundido da Lei de réxime financeiro e orzamentario, aprobado polo Decreto legislativo 1/1999, do 7 de outubro; que regula a concesión de axudas e subvencións que se outorguen con cargo aos orzamentos xerais da Comunidade Autónoma.

A presente orde de axudas é conforme co establecido no artigo 33 do Regulamento (CE) 1257/1999, sobre a axuda ao desenvolvemento rural con cargo ao FEOGA e polo que se modifican e derrogan determinados regulamentos, e conforme co Regulamento (CE) 1260/1999, polo que se establecen disposicións xerais sobre os fondos estruturais.

En virtude do anterior, en consonancia co disposto no artigo 27.15º do Estatuto de autonomía de Galicia e en uso das atribucións que me confire a Lei 1/1983, do 22 de febreiro, reguladora da Xunta e do seu presidente,

#### DISPOÑO:

Artigo 1º.-Obxecto das axudas.

1. A presente orde ten por obxecto o establecemento dun réxime de axudas aplicable aos terreos cinxéticos para a conservación e recuperación do coello de monte (*Oryctolagus cuniculus*), mediante a construción das instalacións necesarias para a súa produción e cría en semiliberdade. Para tal fin a Consellería de Medio Ambiente e Desenvolvemento Sostible levará a cabo un programa de actividades de divulgación das técnicas precisas para a construción destas instalacións.

2. Estas axudas tramitaranse en réxime de publicidade, concorrencia competitiva, obxectividade, transparencia, igualdade e non discriminación, así coma o de eficacia no cumprimento dos obxectivos fixados na presente orde e de eficiencia na asignación e utilización dos recursos públicos, con sometemento en todos os seus extremos ao previsto nos artigos 78 e 79 do texto refundido da Lei de réxime financeiro e orzamentario de Galicia, aprobado polo Decreto legislativo 1/1999, do 7 de outubro, modificado pola Lei 7/2002, do 27 de decembro, de medidas fiscais e de réxime administrativo e o previsto no Decreto 287/2000, do 21 de novembro, polo que se desenvolve o réxime de axudas e subvencións públicas da Comunidade Autónoma de Galicia.

Artigo 2º.-Actuacións subvencionables.

Son obxecto das axudas reguladas pola presente orde a construción ou a reforma das instalacións necesarias (tobas, cerrados e sementeiras) para a produción e cría do coello de monte en semiliberdade, que se inicien

a partir do 1 de xaneiro de 2006 e que rematen no prazo sinalado na resolución de adxudicación a que se refire o artigo 10.3º desta orde.

#### Artigo 3º.-Beneficiarios.

1. Poderán acollerse a estas axudas os titulares de terreos cinexeticamente ordenados tanto de carácter particular como societario (Tecor).

2. Non poderán obter a condición de beneficiarios das axudas previstas nesta orde, as persoas ou entidades en que conorra algunha das circunstancias previstas no artigo 13.2º da Lei 38/2003, do 17 de novembro, xeral de subvencións.

#### Artigo 4º.-Importe das axudas.

1. A Consellería de Medio Ambiente e Desenvolvemento Sostible subvencionará investimentos ata un máximo de 9.000 euros por beneficiario. O importe máximo das axudas será do 75% do investimento. O IVE non será subvencionable.

2. A porcentaxe definitiva da subvención fixarase de acordo cos criterios sinalados no artigo 9º.

3. As axudas desta orde serán compatibles con calquera outra destinada aos mesmos fins, sempre que o total das subvencións non supere o custo total do investimento solicitado.

#### Artigo 5º.-Solicitudes e documentación.

1. Os interesados presentarán as súas solicitudes de subvención segundo o modelo do anexo I, xunto cos respectivos proxectos ou memorias de actividades ou obras que se pretende executar.

2. Xunto coa solicitude presentarase a seguinte documentación:

-Fotocopia do CIF/NIF do beneficiario da subvención.

-Certificación bancaria de ter aberta unha conta a nome do beneficiario da axuda, con expresión do seu CIF/NIF e o número de conta (vinte díxitos).

-Se o titular fora unha sociedade, acordo do órgano competente desta polo que se aproban as accións solicitadas e os compromisos correspondentes, e no cal deberá figurar, así mesmo, a persoa designada como representante daquela para os efectos da solicitude. Xuntarase o DNI da persoa designada.

-Memoria do proxecto, realizada por un técnico competente, que se adecue as indicacións do anexo II e que deberá incluír: descrición das instalacións, plan de captura ou adquisición dos reprodutores, programa orzamentario, orzamento detallado, calendario e prazo aproximado de execución. O plan de manexo do cerrado, e o programa sanitario para aplicar acomodaranse as especificacións do anexo III.

-Declaración do conxunto das solicitudes de axuda efectuadas ou concedidas, para o mesmo proxecto, polas distintas administracións públicas competentes.

-Acreditación dos méritos alegados, segundo o establecido no artigo 9º.

-Acreditación da dispoñibilidade dos terreos para a realización das obras, mediante autorizacións ou permisos dos propietarios dos predios correspondentes ou, polo menos, a súa solicitude. A Dirección Xeral de Conservación da Natureza poderá requirir calquera documentación complementaria que considere conveniente.

#### Artigo 6º.-Prazo de presentación de solicitudes.

As solicitudes de subvención irán dirixidas ao conselleiro de Medio Ambiente e Desenvolvemento Sostible, e presentaranse, debidamente asinadas por duplicado, nas delegacións provinciais, directamente ou ben na forma prevista no artigo 38 da Lei 30/1992, do 26 de novembro, modificada pola Lei 4/1999, do 13 de xaneiro, no prazo dun mes contado a partir do día seguinte ao da publicación desta orde no *Diario Oficial de Galicia*.

#### Artigo 7º.-Mellora e corrección das solicitudes.

Iniciado o procedemento, os servizos provinciais de Conservación da Natureza examinarán as solicitudes e os documentos anexos presentados. No caso de que foran observadas faltas ou omisións, requirirase o interesado para que o expediente sexa emendado ou completado, nos 10 días hábiles seguintes ao da súa notificación, con indicación de que se así non o fixera, se considerará que desistiu da súa petición, arquivándose o expediente sen máis trámite, cos efectos previstos no artigo 42º da Lei 30/1992, do 26 de novembro, dE réxime xurídico das administracións públicas e do procedemento administrativo común, modificada pola Lei 4/1999.

#### Artigo 8º.-Inspección previa.

En todas as solicitudes de actuacións consideradas subvencionables, o persoal técnico realizará unha inspección previa, en que se observará se a acción ou proxecto se axusta á realidade física e económica.

Artigo 9º.-Criterios obxetivos para a adxudicación das axudas.

1. A orde de prelación para a concesión das subvencións basearase na puntuación acadada por cada solicitude, de acordo coas seguintes prioridades:

Criterios de avaliación das actividades subvencionables	Puntos
Acreditación de que se dispón de persoal que se ocupe do manexo das instalacións. Terase en conta a súa cualificación profesional e a dotación de efectivos.	De 0 a 30
Compromiso de peche definitivo, acordado pola asemblea xeral de socios, das instalacións do Tecor dedicadas á cría en gaiola do coello de monte, nun período taxado.	20
Todas as actuacións realizadas no couto ou Tecor, no ano anterior á publicación desta orde, encamiñadas a acadar a recuperación e o mantemento das poboacións do coello de monte: valorarase a calidade e cantidade das rozas; instalación de comedeiros, control de depredadores, instalación de tobeiras, sementeiras para o mantemento das especies cinexéticas e similares.	De 0 a 50
Valoración técnica da calidade da memoria do proxecto.	De 0 a 20
Presentación e valoración dun plan de recuperación do coello no Tecor.	De 0 a 20
Aptitude dos hábitats do Tecor para o coello de monte.	De 0 a 20

2. Quedarán excluídas da concesión da subvención aquelas solicitudes que non acaden un mínimo de 50 puntos. O seu importe fixarase segundo a seguinte escala:

-Entre 50 e 69 puntos: 35% do investimento.

-70 ou máis puntos: 50% do investimento; porcentaxe que se incrementará, se houbera remanentes de crédito, nun 2% adicional por cada punto adicional do baremo por enriba dos 70 sen que, en ningún caso, a axuda poida superar o 75% do investimento.

3. A Administración autonómica procurará un reparto xeográfico equilibrado dos cerrados, para propiciar o efecto divulgador da eficacia deste tipo de instalacións. Para tal efecto, terase en conta este criterio para resolver as posibles situacións de igualdade, que puideran darse entre as solicitudes que se presenten.

4. Os servizos provinciais de Medio Ambiente e Desenvolvemento Sostible emitirán un informe relativo ás solicitudes presentadas, facendo unha valoración das prioridades alegadas e propoñendo a puntuación correspondente a cada unha delas.

5. Unha vez recibidos estes informes na Dirección Xeral de Conservación da Natureza, procederase á súa baremación definitiva por unha comisión composta polo director xeral de Conservación da Natureza, a subdirectora xeral de Recursos Cinexéticos e Piscícolas, e mailo xefe do Servizo de Caza e Pesca Fluvial, á cal poderán ser citados os xefes dos servizos provinciais, que elevará unha proposta de adxudicación ao conselleiro de Medio Ambiente e Desenvolvemento Sostible.

6. A proposta de resolución expresará a persoa solicitante para a que se propón a subvención e maila súa contía, expresando a aplicación dos criterios de avaliación contidos nesta orde. Relacionaranse, de igual xeito, as persoas para as que se propón a denegación da axuda, con expresión das causas de denegación.

#### Artigo 10º.-Obrigas dos beneficiarios.

1. As obras obxecto de subvención deberán contar no momento do seu inicio coas licenzas e autorizacións preceptivas, se estas fosen necesarias.

2. A finalidade ou función da actividade ou obra deberá manterse durante un prazo mínimo de 5 anos.

3. Os investimentos obxecto de subvención deberán realizarse no prazo que se indique na resolución de adxudicación. Excepcionalmente o director xeral de Conservación da Natureza, por delegación do conselleiro, poderá prorrogar tal prazo, antes de que remate o inicialmente concedido, dentro dos límites establecidos no artigo 49.1º da Lei 30/1992, do 26 de novembro, de réxime xurídico das administracións públicas e do procedemento administrativo común.

4. Os beneficiarios deberán conservar os documentos acreditativos da aplicación dos fondos recibidos.

5. Os beneficiarios deberán colocar no lugar onde se realicen as obras un cartel ou placa resistente á intemperie, que indique que a obra se está levando a cabo cunha subvención da Consellería de Medio Ambiente e Desenvolvemento Sostible e que se atopa cofinanciada pola Unión Europea cos respectivos anagramas.

O cartel será por conta do beneficiario e, unha vez rematada a obra, deberá permanecer en lugar visible por un prazo non inferior a 5 anos. O modelo deste cartel será facilitado polo correspondente servizo provincial de Conservación da Natureza.

#### Artigo 11º.-Resolución.

1. O conselleiro de Medio Ambiente e Desenvolvemento Sostible, nun prazo máximo de seis meses contados a partir da publicación no DOG da presente convocatoria, resolverá conceder ou denegar as axudas solicitadas, en atención aos criterios preferentes contidos nela e das disponibilidades orzamentarias. Transcorridos

seis meses dende a publicación da orde, as solicitudes que non foran expresamente resoltas entenderanse denegadas, sen prexuízo da obrigación legal de resolver establecida nos artigos 42 e 44 da Lei 30/1992, do 26 de novembro, de réxime xurídico das administracións públicas e do procedemento administrativo común, modificada pola Lei 4/1999, do 13 de xaneiro.

2. Publicarase no DOG unha relación dos beneficiarios, coa indicación da orde da convocatoria, da partida orzamentaria a que se imputan, contía concedida e finalidade para a que se concede.

3. Denantes da concesión da axuda, a unidade xestora deberá comprobar que o beneficiario se atopa ao día no cumprimento das obrigas tributarias e coa Seguridade Social, así como que non ten débedas, por ningún outro concepto, coa Administración pública desta comunidade autónoma, segundo o disposto no artigo 78.4º b) do Decreto lexislativo 1/1999, do 7 de outubro.

#### Artigo 12º.-Notificación aos interesados.

1. As resolucións serán notificadas a cada un dos solicitantes, dentro dos dez días seguintes á sinatura da resolución.

A resolución, aprobatoria ou denegatoria, esgota a vía administrativa, e contra ela poderase interpoñer o recurso potestativo de reposición perante o conselleiro de Medio Ambiente e Desenvolvemento Sostible no prazo dun mes, contado desde o día seguinte ao da recepción da notificación ou directamente, recurso contencioso-administrativo perante o Tribunal Superior de Xustiza de Galicia, no prazo de dous meses a partir do día seguinte ao da recepción da notificación.

2. Unha vez recibida a notificación, os beneficiarios deberán comunicar por escrito á Dirección Xeral de Conservación da Natureza a súa aceptación ou renuncia segundo as condicións que se indiquen, nun prazo de 15 días.

A aceptación das axudas suporá a conformidade do interesado no cumprimento dos termos que se expresen na súa comunicación.

#### Artigo 13º.-Xustificación do gasto.

1. A Consellería de Medio Ambiente e Desenvolvemento Sostible comprobará a realización efectiva das instalacións e asistirá tecnicamente aos adxudicatarios para que as técnicas de reprodución e cría sexan aplicadas coa maior corrección.

O servizo provincial de Conservación da Natureza, logo da correspondente inspección final, deberá certificar que os investimentos se realizaron de acordo coa resolución aprobada.

2. A xustificación do investimento obxecto de axuda deberase realizar mediante facturas orixinais, con acreditación do seu aboamento, así como, ademais, de ser o caso, as certificacións de obra correspondentes.

Vista a certificación final das obras coa documentación presentada e o informe do servizo provincial correspondente, a Dirección Xeral de Conservación da Natureza fará proposta de aboamento da subvención concedida.

Poderán autorizarse pagamentos parciais, para o que será necesario a presentación da certificación de obra e da factura correspondente. O importe que se aboe por pagamentos parciais non poderá superar o 80% da subvención concedida.

3. Denantes de tramitar o pagamento da axuda, debe-rase comprobar que o beneficiario se atopa ao día no cumprimento das obrigas tributarias e coa Seguridade Social, así como que non ten ninguna outra débeda coa Administración pública desta comunidade autónoma, ao abeiro do establecido no artigo 78.8º, *in fine*, do Decreto legislativo 1/1999, do 7 de outubro.

Artigo 14º.-Disposicións xerais.

1. Poderanse conceder subvencións nas cales o prazo de execución sexa de carácter bianual.

Se se solicita unha execución bianual, deberá especificarse unha proposta de execución detallada, por unidades e orzamento, para cada anualidade.

Nas subvencións bianuais, se por motivos xustificadas non se puidesen realizar as accións completas correspondentes a unha das anualidades, o beneficiario debe solicitar por escrito a modificación da resolución co fin de que a obra se poida completar na anualidade seguinte.

2. O réxime de infraccións e sancións aplicable será o establecido no texto refundido da Lei de réxime financeiro e orzamentario, aprobado polo Decreto legislativo 1/1999, do 7 de outubro, modificado pola Lei 7/2002, do 27 de decembro, e no establecido no Decreto 287/2000, do 21 de novembro, polo que se desenvolve o réxime de axudas e subvencións públicas da comunidade autónoma.

Artigo 15º.-Revogación.

1. As axudas poderán ser revogadas nos seguintes supostos:

a) Cando se comprobe que as axudas foron destinadas a unha finalidade diferente daquela para a que foron concedidas.

b) Pola non realización da obra ou traballos obxecto da subvención.

c) A non presentación ou presentación fóra de prazo, de calquera documentación requirida en calquera momento da tramitación.

d) Cando existan modificacións das accións previstas de forma que desvirtúen os obxectivos descritos na presente orde.

e) Por ocultar, manipular, falsear datos ou entorpecer de forma deliberada o labor de inspección e control.

f) Por perda da titularidade dos terreos, ou por perda de personalidade xurídica das empresas ou asociacións, se o novo titular non se subrogase expresamente.

g) Cando o beneficiario da subvención incumpra calquera das condicións establecidas tanto nesta orde como no resto da normativa aplicable.

h) Por incumprimento de calquera dos prazos establecidos na presente orde.

i) Por incumprimento de calquera das disposicións legais vixentes.

2. En todos os supostos anteriormente citados, e por proposta do director xeral de Conservación da Natureza, tralo informe previo do servizo provincial, e trala audiencia previa ao interesado, o conselleiro de Medio Ambiente e Desenvolvemento Sostible poderá revogar, total ou parcialmente as axudas que foron concedidas no seu día e declarará a obriga de reintegro á Xunta de Galicia das cantidades percibidas, co aboamento dos xuros de demora fixados pola lei.

3. No referente aos reintegros totais ou parciais, revogacións, infraccións ou sancións, aos beneficiarios das axudas seralles de aplicación o previsto no Decreto legislativo 1/1999, do 7 de outubro.

Artigo 16º.-Alteración das condicións da subvención.

Toda alteración das condicións tidas en conta para a concesión da subvención, e en todo caso a obtención concorrente coas outorgadas por outras administracións ou entes públicos ou privados, nacionais ou internacionais, poderá dar lugar á modificación da resolución de concesión.

No caso de producirse unha minoración dos investimentos previstos, mantendo os obxectivos iniciais, a subvención concedida diminuírase na contía proporcional correspondente, sempre que o conxunto do investimento cumpra os fins previstos inicialmente.

Artigo 17º.-Obriga de facilitar información.

Ademais da documentación complementaria que os órganos correspondentes da Dirección Xeral de Conservación da Natureza lles poidan exixir durante a tramitación do procedemento, os beneficiarios das axudas previstas nesta orde teñen a obriga, conforme o artigo 78.4º d) do Decreto legislativo 1/1999, de facilitar toda a información que lles sexa requirida polos órganos dependentes do organismo pagador, pola Intervención Xeral da Comunidade Autónoma, polo Tribunal de Contas e polo Consello de Contas, no exercicio das súas funcións de fiscalización e control do destino das axudas públicas, así como por calquera órgano de inspección ou control da Unión Europea.

Artigo 18º.-Financiamento.

1. As axudas concedidas ao abeiro da presente orde, cofinanciada con fondos FEOGA-Orientación, teñen carácter bianual e financiaranse con cargo á aplicación orzamentaria 15.02.342A.780.1, código de proxecto 15.00.705, dos orzamentos xerais da Comunidade Autónoma de Galicia para o ano 2006, ata un importe máximo de 160.000 euros para este exercicio e 80.000 euros para 2007, sendo susceptible de ampliación con cargo a outras partidas orzamentarias.

#### *Disposición transitoria*

Con cargo á presente convocatoria poderanse atender as solicitudes presentadas e non resoltas, ao abeiro da orde da Consellería de Medio Ambiente do 16 de maio de 2005 (DOG nº 100, do 26 de maio) sempre que cumpran con todos os requisitos exixidos na presente disposición.

#### *Disposicións derradeiras*

Primeira.-Facultase o director xeral de Conservación da Natureza para modificar os prazos de execución e xustificación e, en xeral, para ditar as instrucións necesarias para o desenvolvemento e execución do disposto na presente orde.

Segunda.-Esta orde entrará en vigor o día seguinte ao da súa publicación no *Diario Oficial de Galicia*.

Santiago de Compostela, 31 de marzo de 2006.

Manuel Vázquez Fernández  
Conselleiro de Medio Ambiente  
e Desenvolvemento Sostible

## ANEXO I

**XUNTA DE GALICIA**CONSELLERÍA DE MEDIO AMBIENTE  
E DESENVOLVEMENTO SOSTIBLE

PROCEDEMENTO <b>AXUDAS PARA A RECUPERACIÓN DO COELLO DE MONTE</b>	CÓDIGO DO PROCEDEMENTO <b>MA721A</b>	DOCUMENTO <b>SOLICITUDE</b>
--	---	--------------------------------

**DATOS DO SOLICITANTE**

TECOR/EXPLOTACIÓN CINEXÉTICA COMERCIAL (NOME, MATRÍCULA, CONCELLO)			
ENTIDADE			CIF/NIF
ENDEREZO		LOCALIDADE	
PROVINCIA	CÓDIGO POSTAL	TELÉFONO	FAX

**REPRESENTANTE**

DON/DONA			CIF/NIF
ENDEREZO		LOCALIDADE	
PROVINCIA	CÓDIGO POSTAL	TELÉFONO	FAX

**DOCUMENTACIÓN QUE SE XUNTA**

<input type="checkbox"/>	FOTOCOPIA DO CIF/NIF DO SOLICITANTE DESTINATARIO DA SUBVENCIÓN.
<input type="checkbox"/>	ACORDO OU ACTA DO ÓRGANO COMPETENTE DA SOCIEDADE OU ASOCIACIÓN.
<input type="checkbox"/>	DECLARACIÓN XURADA DO CONXUNTO DAS SOLICITUDES EFECTUADAS OU CONCEDIDAS PARA O MESMO PROXECTO DAS DISTINTAS ADMINISTRACIÓNS PÚBLICAS COMPETENTES.
<input type="checkbox"/>	CERTIFICACIÓN DA CONTA BANCARIA DO DESTINATARIO.
<input type="checkbox"/>	MEMORIA TÉCNICA DO PROXECTO.
<input type="checkbox"/>	ACREDITACIÓN DOS MÉRITOS PREVISTOS NO ARTIGO 5º.
<input type="checkbox"/>	OUTROS _____

LEGISLACIÓN APLICABLE  <i>Orde do 31 de marzo de 2006 pola que se establecen e regulan axudas para a conservación e recuperación das poboacións do coello de monte autóctono.</i>
SINATURA DO SOLICITANTE OU PERSOA QUE O REPRESENTA  _____ de _____ de 200

Conseleiro de Medio Ambiente e Desenvolvemento Sostible

(Para cubrir pola Administración)		NÚMERO DE EXPEDIENTE
RECIBIDO		DATA DE ENTRADA / /
REVISADO E CONFORME		DATA DE EFECTOS / /
		DATA DE SAÍDA / /

Remitir información ao Servizo de Caza e Pesca Fluvial:

Praza Luís Seoane, s/n-5ª planta  
15008 A Coruña

Rolda da Muralla, 70-1ª planta  
27002 Lugo

Avenida da Habana, 79-1º  
32004 Ourense

Rúa Benito Corbal, 47-5ª planta  
36071 Pontevedra

*ANEXO II*

Indicacións xerais básicas ás que deben axustarse os proxectos de produción e cría de coellos de monte en réxime de semiliberdade.

Os terreos dedicados á cría de coellos en semiliberdade terán entre 2.500 e 3.500 m<sup>2</sup>, incluíndo os cerrados de produción principal e de apoio.

Os cerrados estarán rodeados por un valo dunha altura non inferior aos dous metros, que impida tanto a entrada doutros animais, especialmente predadores ou persoas, como a saída dos coellos. Ademais, débese profundar no chan máis de medio metro, ou ata atopar un substrato dificilmente escavable. A gabiña escavada encherase cunha cimentación de formigón, ou ben enterrarase unha malla metálica.

O cerrado de produción principal terá dúas partes, unha de alimentación e outra de refuxio, separadas por un valado con pasos que poidan pecharse á vontade.

A zona de alimentación ocupará o 90% do cerrado e disporá dun prado para a alimentación dos coellos, en que se instalarán bebedeiros e comedeiros e que contará con algunha estrutura de refuxio provisional que facilite a captura dos animais. O prado sementarase unicamente con gramíneas perennes de porte baixo, evitando as especies propias de prados de sega. Disporá necesariamente dun sistema de rega.

Na zona de refuxio instalaranse alomenos 6 tobas artificiais, onde os coellos poidan construír as súas goridas de acubillo e cría. As tobas artificiais terán unha estrutura piramidal, duns 20-30 m<sup>2</sup> de base e uns 2 m de altura, composta de pedras ou raíces de árbores co tamaño suficiente como para deixar ocos entre elas e cubertas de terra en abundancia. A terra empregada debe ser rica en materia orgánica.

O cerrado de apoio terá unha superficie mínima de 500 metros cadrados, cunhas características similares á zona de alimentación do cerrado principal.

*ANEXO III*

Indicacións básicas ás que deben axustarse os programas de manexo e sanitario dos centros de cría de coello de monte en semiliberdade.

A densidade de reprodutores deberá manterse en torno a un macho por cada 200 m<sup>2</sup> de superficie e unha femia por cada 100 m<sup>2</sup> de superficie. Admíttanse variacións dun 20% destes valores.

A procedencia dos reprodutores debe asegurar que se trata de coellos de monte procedentes de Galicia, nunca hibridados con coellos domésticos.

Deberá contarse cun sistema de identificación dos coellos e cun sistema de rexistro documental que permita un axeitado manexo. Estes sistemas deberán detallarse no plan de manexo.

Deberá establecerse un réxime de capturas (mínimo un ao mes, durante os meses de actividade reprodutora) que permita a revisión dos reprodutores e o seu tratamento veterinario se fora preciso, e a captura dos novos individuos para a súa marcaxe, revisión, tratamento e traslado ao peche de apoio.

O programa sanitario incluírá un protocolo de vacinación fronte á mixomatose e á enfermidade

hemorráxica vírica e medidas de loita contra os parásitos internos e externos, entre outras cuestións. Prestarase especial atención á coccidiose.

#### **IV. OPOSICIÓNS E CONCURSOS CONSELLERÍA DE POLÍTICA TERRITORIAL, OBRAS PÚBLICAS E TRANSPORTES**

*Orde do 30 de marzo de 2006 pola que se resolve a convocatoria para a provisión, polo sistema de libre designación, de varios postos de traballo vacantes nesta consellería, anunciada pola Orde do 25 de novembro de 2005.*

Convocada a provisión, polo sistema de libre designación, de varios postos de traballo vacantes nesta consellería, por Orde do 25 de novembro de 2005 (DOG nº 234, do 7 de decembro), e resolta parcialmente por ordes do 25 de xaneiro e 16 de marzo de 2006 (DOG nº 22, do 1 de febreiro e nº 56 do 21 de marzo, respectivamente), de conformidade co disposto no artigo 27.2º da Lei 4/1988, do 26 de maio, da función pública de Galicia, na súa nova redacción dada pola Lei 3/1995, do 10 de abril, e nos artigos 16 e 17 do Decreto 93/1991, do 20 de marzo, e no uso das facultades conferidas polo artigo 15.4º da referida lei,

Esta consellería

*DISPÓN:*

Primeiro.-Resolver a convocatoria pública para a provisión, polo sistema de libre designación, de varios postos de traballo vacantes nesta consellería, anunciada pola Orde do 25 de novembro de 2005 (DOG nº 234, do 7 de decembro), e resolta parcialmente por ordes do 25 de xaneiro e 16 de marzo de 2006 (DOG nº 22, do 1 de febreiro, e nº 56, do 21 de marzo, respectivamente).

Segundo.-Adxudicar destino, no posto de traballo que se indica e seleccionar o persoal que se relaciona no anexo I desta.

Terceiro.-O cesamento no destino actual do persoal que obtivo praza producirase no prazo de tres días, contados a partir do seguinte ao da publicación desta orde no *Diario Oficial de Galicia*.

O prazo para a toma de posesión do novo destino será de tres días a partir do seguinte ao do cesamento, de tratarse da mesma localidade onde actualmente o persoal preste servizos, ou dun mes se radica en distinta localidade, de conformidade co establecido no artigo 14 do Decreto 93/1991, do 20 de marzo, e o disposto na base sétima da convocatoria.

O cómputo de prazos de posesión iniciarase cando rematen os permisos ou licenzas, que, de ser o caso, fosen concedidas ao citado persoal. Nos supostos de baixa temporal ou transitoria, iniciarase a partir da correspondente alta.

Cuarto.-O xefe do centro no que cause baixa o persoal, así como o daquel no que obteña destino, consignarán no título administrativo, dentro do prazo sinalado no punto anterior, as correspondentes dilixencias de cesamento e toma de posesión.